

- Spektakularna akvizicija “Stanić grupe“
- Oporavak koksne industrije Lukavac
- Vlada Kosova prodaje telekom
- Pozitivni makroekonomski trendovi



USPJEH KOMPANIJE IZ KREŠEVA
Stanić Grupa ima priliku izaći na regionalno tržište

Stanić Grupa preuzima Merkur?!

Stanić grupa iz Kreševa ima velike izgleda da s njemačkim partnerom BFS-om preuzme značajan dio imovine slovenačkog trgovačkog lanca *Merkur*, koji se nalazi pred stečajem. Merkur je najveći trgovinski lanac iz Slovenije koji prodaje tehničku robu, s razgranatom prodajnom mrežom na Balkanu u kojoj radi više od 4.800 radnika. Prema dostupnim podacima, Stanići su s njemačkim partnerom zainteresirani prije svega za Merkurovu imovinu u Hrvatskoj i BiH, koja je već neko vrijeme u vlasništvu nekoliko komercijalnih banaka. Dugovi Merkura prema bankama i dobavljačima procjenjuju se na skoro milijardu eura i premašili su 50 posto ukupnog kapitala kompanije. U takvom okolnostima, uprava Merkura je prisiljena poduzeti drastične mjere što, pored ostalog, uključuje i masovnu rasprodaju imovine kako bi se namirio makar dio dospjelih potraživanja.

U maju ove godine Stanić grupa iz Kreševa potpisala je ugovor o poslovnoj suradnji s njemačkom kompanijom BFS koja posluje u okviru poznatog njemačkog konzorcija *BayWa* sa sjedištem u Minhenu. “BayWa“ razvio je tri poslovne divizije: trgovinu tehničkom robom, trgovinu građevinskim materijalom te razvoj kapaciteta obnovljivih izvora energije. Strateški partner Stanić grupe, BFS, razvija trgovinu poljoprivrednim alatima, mašinama i materijalom, a u svojoj mreži maloprodajnih objekata ima i čitav niz drugih tehničkih proizvoda namijenjenih domaćinstvima i maloj privredi. Riječ je o velikom trgovinskom igraču sa skoro stogodišnjom tradicijom u trgovini u Njemačkoj i izvan nje. Preko Stanić grupe njemačka kompanija BFS pokušava prodrijeti i na tržište Balkana, na kojem do sada nije bila prisutna.

Proizvodnja u GIKIL-u porasla 2,5 puta

U šest mjeseci 2010. godine *Global Ispat koksna industrija Lukavac* (GIKIL) zabilježila je najbolje poslovne rezultate u posljednjih pet godina otkako je nekadašnji kombinat iz Lukavca “Boris Kidrič“ prešao u ruke indijske kompanije. Prema podacima kantonalne Privredne komore Tuzla, GIKIL je u prvih šest mjeseci tekuće godine povećao proizvodnju koksa za nevjerojatnih 269 posto, a sličnim postocima mjeri se i rast proizvodnje katrana, amonijum - sulfata i koksnog gasa.

Globalni val krize iz stroja je izbacio 400 fabrika koksa u svijetu, no kompanija iz Lukavca ostala je na nogama. Uspjela je očuvati sva radna mjesta (blizu 1.000 radnika) i spremno dočekati privredni oporavak evropske ekonomije. Potražnja za koksom u Evropi počela je rasti početkom godine zajedno s potražnjom čelika, a takav razvoj događaja mogao se naslutiti još potkraj 2009. godine kada je GIKIL sklopio nekoliko velikih ugovora o isporuci koksa. Glavnina koksa proizvedenog u Lukavcu plasira se u BiH (Zenica - *Arcelor Mittal*) i Srbiji (Smederevo - *US Steel*).

GIKIL spada među 10 najvećih bh. izvoznika s godišnjim izvozom od oko 320 miliona dolara. Većinski paket dionica u GIKILU drži *Ispat Industries Limited* (IIL) iz Indije, koji je inače specijaliziran za proizvodnju visokokvalitetnih čelika.

